

श्रीः
श्रीमते रामानुजाय नमः
श्रीमते निगमान्तमहादेशिकाय नमः

गोस्वामी श्री तुलसीदास जी द्वारा रचित
॥ श्री हनुमान चालीसा ॥

This document has been prepared by

Sunder Kidāmbi

with the blessings of

श्री रङ्गरामानुज महादेशिकन्

His Holiness śrīmad āṇḍavan śrīraṅgam

श्रीः
श्रीमते रामानुजाय नमः
श्रीमते निगमान्तमहादेशिकाय नमः
॥ श्री हनुमान चालीसा ॥

दोहा

श्रीगुरु चरन सरोज रज
निज मनु मुकुरु सुधारि।
बरनउँ रघुबर बिमल जसु
जो दायकु फल चारि ॥

बुद्धिहीन तनु जानिके
सुमिरौं पवनकुमार।
बल बुद्धि बिद्या देहु मोहिं
हरहु कलेस बिकार ॥

चौपाई

जय हनुमान ज्ञान गुन सागर।
जय कपीस तिहुँ लोक उजागर ॥ 1 ॥

राम दूत अतुलित बल धामा।
अंजनिपुत्र पवनसुत नामा ॥ 2 ॥

महाबीर बिक्रम बजरंगी।
कुमति निवार सुमति के संगी ॥ 3 ॥

कंचन बरन बिराज सुबेसा।
कानन कुण्डल कुंचित केसा ॥ 4 ॥

हाथ बज्र औ ध्वजा बिराजै।
काँधे मूँज जनेऊ साजै ॥ 5 ॥

संकर सुवन केसरीनंदन।
तेज प्रताप महा जग बंदन ॥ 6 ॥

बिद्यावान गुनी अति चातुर।
राम काज करिबे को आतुर ॥ 7 ॥

प्रभु चरित्र सुनिबे को रसिया।
राम लखन सीता मन बसिया ॥ 8 ॥

सूक्ष्म रूप धरि सियहिं दिखावा।
बिकट रूप धरि लंक जरावा ॥ 9 ॥

भीम रूप धरि असुर सँहारे।
रामचंद्र के काज सँवारे ॥ 10 ॥

लाय सजीवन लखन जियाये।
श्रीरघुबीर हरषि उर लाये ॥ 11 ॥

रघुपति कीन्ही बहुत बड़ाई।
तुम मम प्रिय भरतहि सम भाई ॥ 12 ॥

सहस बदन तुम्हरो जस गावैं।
अस कहि श्रीपति कण्ठ लगावैं ॥ 13 ॥

सनकादिक ब्रह्मादि मुनीसा।
नारद सारद सहित अहीसा ॥ 14 ॥

जम कुबेर दिगपाल जहाँ ते।
कबि कोबिद कहि सके कहाँ ते ॥ 15 ॥

तुम उपकार सुग्रीवहिं कीन्हा।
राम मिलाय राज पद दीन्हा ॥ 16 ॥

तुम्हरो मंत्र बिभीषन माना।
लंकेश्वर भए सब जग जाना ॥ 17 ॥

जुग सहस्र जोजन पर भानू।
लील्यो ताहि मधुर फल जानू ॥ 18 ॥

प्रभु मुद्रिका मेलि मुख माहीं।
जलधि लाँघि गये अचरज नाहीं ॥ 19 ॥

दुर्गम काज जगत के जेते।
सुगम अनुग्रह तुम्हरे तेते ॥ 20 ॥

राम दुआरे तुम रखवारे।
होत न आज्ञा बिनु पैसारे ॥ 21 ॥

सब सुख लहै तुम्हारी सरना।
तुम रच्छक काहू को डरना ॥ 22 ॥

आपन तेज सम्हारो आपै।
तीनों लोक हाँक तें काँपै ॥ 23 ॥

भूत पिसाच निकट नहिं आवै।
महाबीर जब नाम सुनावै ॥ 24 ॥

नासै रोग हरै सब पीरा।
जपत निरंतर हनुमत बीरा ॥ 25 ॥

संकट तें हनुमान छुड़ावै।
मन क्रम बचन ध्यान जो लावै ॥ 26 ॥

सब पर राम तपस्वी राजा ।
तिन के काज सकल तुम साजा ॥ 27 ॥

और मनोरथ जो कोई लावै ।
सोई अमित जीवन फल पावै ॥ 28 ॥

चारों जुग परताप तुम्हारा ।
है परसिद्ध जगत उजियारा ॥ 29 ॥

साधु संत के तुम रखवारे ।
असुर निकंदन राम दुलारे ॥ 30 ॥

अष्ट सिद्धि नौ निधि के दाता ।
अस बर दीन जानकी माता ॥ 31 ॥

राम रसायन तुम्हरे पासा ।
सदा रहो रघुपति के दासा ॥ 32 ॥

तुम्हरे भजन राम को पावै ।
जनम जनम के दुख बिसरावै ॥ 33 ॥

अंत काल रघुबर पुर जाई ।
जहाँ जन्म हरिभक्त कहाई ॥ 34 ॥

और देवता चित्त न धरई ।
हनुमत सेइ सर्ब सुख करई ॥ 35 ॥

संकट कटै मिटै सब पीरा ।
जो सुमिरै हनुमत बलबीरा ॥ 36 ॥

जै जै जै हनुमान गोसाईं ।
कृपा करहु गुरु देव की नाईं ॥ 37 ॥

जो सत बार पाठ कर कोई।
छूटहि बंदि महा सुख होई ॥ 38 ॥

जो यह पढ़ै हनुमान चालीसा।
होय सिद्धि साखी गौरीसा ॥ 39 ॥

तुलसीदास सदा हरि चेरा।
कीजै नाथ हृदय महँ डेरा ॥ 40 ॥

दोहा

पवनतनय संकट हरन
मंगल मूरति रूप।
राम लखन सीता सहित
हृदय बसहु सुर भूप ॥

॥ इति श्री हनुमान चालीसा समाप्ता ॥